

石

匱

書

石匱書卷第二百二十四

明 劔南張 岱著

朝貢諸夷攷

占城

占城古曰占不勞國在廣東北古越裳界本秦象  
郡林邑縣地漢分為二縣屬日南郡漢末有區連者  
殺縣令稱林邑王唐時諸葛地取之後為都護張升  
所擊破徙居占號占城宋時襲破真臘及為真臘所

滅名國曰占臘 太祖即位方遣使詔諭其國主阿  
荅阿者已遣虎都蠻來朝貢虎象稱賀使歸賜璽書  
明曆金綺四年阿荅阿者遣荅班爪下農奉金葉表  
朝貢言安南數侵境乞賜兵器樂人俾安南知我乃  
聲教所被輸貢之地不敢輒欺負 上憐之命中書  
省移咨安南令其罷兵十六年遣予來賀聖節賜勘  
合文冊二十四年使至言其臣門閣勝弒主自立  
上惡絕之永樂四年征李穡尚書陳洽馳奏占城國

王陰助率犂請發兵討之。上以交趾初平不欲窮  
兵遂寢其事。永樂後朝貢不絕其國在大海南。距  
真臘西距交趾東北際海自閩長樂五虎門西南行  
順風可十日至東北百里海口立石塔為標舟至是  
繫烏俗獷悍果於戰鬥尚釋教王冠三山金花玲瓏  
冠衣白跣足乘象或黃犢車臣美葉冠男蓬頭女後  
椎結所居茅茨不得踰三尺王居鑄金首長之居梵  
磚灰雕鏤獸畜重累羊皮以代紙削細竹為筆蘸灰

書之字形如蚯蚓王歲皆飲人胆酒又以浴有吉慶  
將領獻人胆以賀王位三十年即入山茹素受戒令  
子姪攝國居一歲額天自矢曰我不道當充虎狼食  
或病死其年得無恙復入為王馬哈刺札云有號屍  
致魚者婦人也目無瞳夜飛頭入人家食小兒穢氣  
侵兒腹兒即即死頭返合體如故失其體不得合即  
死夫不聞者罪之產金銀錫鐵獅象犀牛瑇瑁諸香  
朝霞大火珠菩薩石薔薇水猛火油檳榔諸文異木

胡椒白藤吉貝絲紋白氎布孔雀山雉伽南香惟此地有之價亦高觀音竹如藤長丈八尺許色黑如鐵寸二三節犀角象牙最多犀如水牛大者八百斤體黑無毛蹄有三趾獨角在鼻端長者可尺五寸馬小於驢波羅密形如東瓜

### 三佛齊

三佛齊即舊港又名淳淋在東南海中本南蠻別種初隸爪哇有地十五州東距爪哇西距滿刺加南距

大山西北濱海。番舶輻輳。多廣東漳泉人。土沃宜稼。  
穡人好賭博。習水戰。服藥刀。不能傷。遇敵敢死。隣國  
畏之。水多土少。將領得居陸。民率架筏水中。架梁柱。  
語口如瓜哇。市用錢布。字用梵書。其屬有單馬令凌。  
牙斯蓬。豐登。牙儂。細蘭諸國。洪武初。王恒麻沙那阿。  
稱臣入貢。四年遣玉的力馬罕亦里麻思奉金字表。  
朝貢。賜大統曆。文幣。六年使來貢。八年使從我招諭。  
拂菻。十年恒麻沙那阿卒。賜王子麻那者巫思三佛。

齊國王印；駝鈕銀質鍍金。是時廣東有陳祖義者，  
脫罪避居其國。久之得為將領，暴橫掠過客。永樂中，  
太監鄭和統海舶下西洋，至三佛齊，有施進者，祖義  
鄉人也。訴于和，擒殺祖義，承制官進仍留舊港為  
將領。進沒女嗣官，產鶴頂火雞、神鹿、金銀水晶珠、瑠  
璃珊瑚、犀角、象牙、龍腦、諸香、猫睛石、薔薇水、阿魏、沒  
藥、血結、鶴頂鳥、大於鴨、腦骨厚寸餘、外黃內赤、鮮麗  
可愛、火雞大於鶴、頸足六、似鶴、軟紅冠、銳背毛如青。



羊色瓜甚利傷人腹致死食炭神鹿大如巨豕高可  
三尺短毛承喙蹄三趾

真臘

真臘本扶南屬國一名占臘在東海中隋始通中國  
唐神龍中并扶南而國分為二其南近海多陂澤為  
水真臘北多山阜為陸真臘後復合為一宋宣和初  
封為真臘國王慶元中破占城立其國人為占城王  
占城遂為屬國又有參半真里登流眉蒲甘等國皆

屬真臘聚落頗衆地亦廣洪武六年國王忽兒那遣  
奈亦吉即表獻方物賜大統曆文綺二十年正黎列  
保昆耶甘苦者遣使貢象及方物景泰二年貢賜王  
及妃文綺朝貢至今不絕其族尚華侈東向為上右  
手為潔縣鎮風習大類占城王三日一視朝婚娶燃  
燈不息視力耕種產銅金諸香象翠羽嘉樹異魚

### 暹羅

暹羅本暹典羅斛二國在南海中暹土瘠不宜耕稼

羅斛土平衍種多獲暹仰給焉元至正間暹降羅斛  
洪武四年暹羅斛國王參烈昭昆牙遣奈思哩儕刺  
識悉替奉金葉表朝貢賜大統曆十年遣子昭祿群  
膺奉金葉表貢象及方物遣使賜詔及暹羅國王之  
印十六年給勘合文冊令如期朝貢永樂元年稱暹  
羅國十五年瑣里八昭祿群膺哆囉諦刺為王遣奈  
必上表貢方物乞量衡式賜古今列女傳金綺量衡  
令三年一朝貢宣德中稍減賜物著令其國方千餘

里群山環繞峭拔崎嶇地下濕土踈惡風候嵐熱不  
齊自占城西南舟行七晝夜至其國王宮壯麗民樓  
居其樓密聯檳榔片藤繫之甚固藉以藤簾竹簟寢  
處於中王白布纏首腰束嵌絲帨加錦綺跨象或乘  
肩輿尚釋教國人效之好為僧尼婦人多習夫聽于  
妻：與國中人不為怪男陽嵌珠玉富貴者範金  
盛珠行有聲婚則群僧迎壻至女家僧取女紅貼男  
額稱利市喪禮貴者灌水銀壙民間鳥壙言語大類

廣東俗流浮習水戰好鬪喜寇掠市用海貳煮海為  
鹽釀林為酒產寶石奇香異木翠羽獅白象白鼠蘓  
木賤如薪色絕勝六足龜珊瑚

蘇門答剌

蘇門答剌國漢之條支唐之波斯大食皆其地也其  
西有蘇鄰國摩尼佛生焉號具智大明使自唐時入  
中國相傳老子西入流沙五百餘歲當漢獻帝建安  
之戊子寄形捺摩國王拔帝之后食而甘之遂有孚

臂胸而出是為摩尼佛袿暈者禁苑石榴也其說與  
攀李樹出脇相應其教曰明衣尚白朝拜日夕拜月  
了見法性究竟廣明蓋合釋老而一之行於拂菻火  
羅諸國晉武帝太始丙戌滅虔于波斯太祖有天下  
以其教門上通國號禁除之永樂三年酋長宰奴里  
阿必丁遣使朝貢詰封為國王、與鄰國花面王戰  
死其子鎖丹罕阿必鎮幼其妻號于國曰誰復此讐  
我以為夫國中有漁父者遂為王妻殺花面王妻曰

夫我遂尊漁父為王號為老王老王遣使來貢久之  
鎮丹罕阿必鎮長陰與部曲謀殺漁父而漁父之子  
蘇幹刺者復謀殺鎮丹罕阿必鎮為父執讐鄭和入  
海賜諸番蘇幹刺怨朝賜僅父鎮丹罕阿必鎮領眾  
邀擊和軍和與戰敗之蘇幹刺走追至喃漳國并獲  
其妻子俘行在伏誅宣德中一再貢厚賜之九年王  
弟哈利之漢來貢麒麟象禮部尚書濬請表賀不許  
曰朕貴異物耶遠人來不逆其意耳亡何卒京師上

曰遠人傾嚮死可憫也贈之鴻臚寺少卿賜誥治喪  
墓給守塚戶十年請封其子為王其來貢至於正統  
天順間其數傳於今再易姓萬曆中為國王者其國  
中之大酋奴也奴為其大酋牧象、肥大酋喜使掌  
魚入其稅奴得大魚輒上酋不以充稅酋益喜甚親  
之大酋為其國王掌兵；皆在大酋手大酋入見王  
甚恭大酋出奴曰主何恭大酋曰王也奴曰主不欲  
耳欲之王矣因言我國王坐殿中甚肅第左右數人



耳主入見請王屏左右密言事王必從奴直上刺殺  
王主可王矣大酋從之其計果行遂刺殺王大呼殿  
上曰吾主王矣孰敢不從其殿下卒不知所為大酋  
所掌兵又在門外因誅其偶語者數人其餘悉授官  
大酋益德奴與之以所掌兵他日奴又以其兵刺殺  
大酋而自為王其國風俗醇良言語和媚民居技藝  
與中土同賄貨充牣其地遼遠至者倍利其西海中  
有龍涎嶼焉群龍交戲遺涎其上故名龍涎之香其

鄰有故臨國有默伽國有那孤國故臨國人黑如漆  
好為寇盜那孤國即花面王所居國也或曰是國也  
即須文達那國須文達那宋名也洪武十六年其國  
王表貢請改曰蘇門答剌然其貢物與須文達那異

瓜哇

瓜哇唐訶陵國也一曰闍婆一曰蒲家龍其國東古  
女人西三佛齊南古大食北真臘其屬夷有蘓吉丹  
打板網底勿教種而三齊佛六羈事之高帝即位遣

行人賜之璽書頒明曆遣送其故時使元之未歸者  
四年國王昔里八達刺八刺蒲遣使表貢方物納元  
宣勅受明封昔里八達刺八刺蒲死于八達那巴那  
務立九年三佛齊國王于父死不敢自王求封天子  
高帝嘉其恭使往道瓜哇境上瓜哇謂三佛齊故  
我羈事而明封與埒要殺使十三年獻黑奴三百上  
切責所以要殺明使者絕其後獻而詔諭之曰吾欲  
拘爾使念父母妻子之戀夷夏一也是時其國已分

為東西二王東王、東海西王、西海矣成祖即位  
西王都馬板遣使入賀賜其王襲衣文綺二年東王  
李令達哈遣貢求王印予之復賜東西二王雜繒幔  
悅器皿羊酒及王妃繒綺諸物三年西王復使貢其  
旁近牒里日夏羅治金貓里三小國亦附之來四年  
二王皆貢五年西王擊東王滅之明使者在東王城  
者百七十八竝在擊殺中西王懼罪請以黃金三千  
餘斤贖罪併請立東王子從之既所贖三不足一上

曰要使遠人知罪則已赦不問八年十一年西王歲貢十三年更都馬板曰楊維西沙使者常不絕宣德後乃稍踈正統中令其三歲為期其後亦間貢耳而東王竟久不至蓋先是為西王所破詭言欲立其子竟不果而遂滅一爪哇人黝面髭跣食啖蛇蟻虫豸至與犬同卧嗽俗好鬪子生一歲佩之匕首以金銀象牙為靶名曰不刺頭忿則挾相刺殺人者能逃匿出三日即不復抵罪婚則男過女家者五日乃迎

婦歸婦披髮裸跣縈繒被金寶前後擁衛如軍容病  
則禱不服藥堇用水火犬三惟死者所命之貴人死  
婢妾隨至野妾貴人屍於衆犬自焚以殉之其王蓬  
首冠金葉胸縈纁腰束錦四丈之宮碑墉以居藤簾  
而跣趺乘象或牛罪無輕重皆用刑殺市用中國古  
錢衡量倍中國鄭和至其國時遺石控可百斤其重  
二千餘人不能舉也一日舉之他所國中大瘟疫國  
王乃移還和所置處故志其國四鄉富饒澹溢閩粵

西番人至久賈長子孫地廣人稠為東洋諸番冠而  
余嘗至粵下博問諸賈胡謂爪哇窮儉酗酒嗜財奸  
毒劫豈隆窳良悍夷亦時也其屬國曰加番玳下機  
至蘇吉丹主蘇吉丹國者曰吉力石吉力石王百歲  
餘能知吉凶

古里

古里大國西洋諸番之會去中國十萬里西瀕海南  
距柯枝自柯枝海行可三日至永樂元年王馬那必

加刺滿遣馬戍朝貢馬五年遣太監鄭和賜王誥幣  
陞其將領有差王奸浮屠敬象牛老不傳子傳外孫  
否則傳弟無外孫弟傳善行人族類分五種如柯枝  
王南毘人不食牛將領曰人不食猪犬家晨起用  
牛糞塗地煨牛糞為囊佩之每旦水調抹額及股國  
事皆決于二將領土土麥多馬俗尚信義行者讓路  
道不拾遺海濱為市通諸番用金銀錢以葫蘆為樂  
器紅銅絲為絃歌聲相協鏗鏘可聽刑無鞭笞輕斷



手足重罰金誅戮沒產夷其族有西洋布曰搭黎本  
出鄰國坎夷巴匹濶四尺五寸色絲間花腕濶五尺  
產孔雀白鳩馬無餘鳥諸香膏貢金絲寶帶金絲細  
如髮結花綴八寶珍珠鴉鵲石

淳泥

淳泥國西南海中國也州十四未羈事闍婆其地炎  
熱多風雨板城銅甲王縮髮裸跣徒行花帛繚腰所  
居若樓覆以貝多葉其民剪髮覆額女人短衣蔽胸

背花帛繚腰散髮跣其俗漁煮海為鹽漚椰為酒無  
稻麥或腥食魚蝦或食木實漿曰沙糊燕樂鳴鼓擊  
鉦刻貝葉行書事佛謹明興其國王馬合沙謨也國  
侵於蘇祿闍婆為發兵擊却之洪武三年福建行省  
都事沈秩與監察御史張敬之奉詔其國王不為禮  
秩傳譯曰皇帝撫有四海極日窮月無不臣順淳泥  
彈丸墜何敢抗中國大天子王懼然起謝撤座設几  
拜受詔請後之三年造舟入貢秩曰皇帝即位三年

夫四夷朝貢使者頂踵相狎即行尚晚何年之三也  
王曰非有他地瘠民貧而又被兵室國無以獻明日  
與國相王宗恕圖行有日閼婆使人言曰我實為  
王却蘇祿兵王歸中國無我矣蘇祿再來則請抹於  
中國王懼明日秩見辭以疾秩知之乃對宗恕大言  
曰王甘臣閼婆即謂閼婆非中國臣耶宗恕入白王  
王乃大會官屬遣其臣六思麻亦等四人貢與秩俱  
既至高帝寵賚甚厚成祖初麻亦惹加那乃為王遣

使封之六年率其妃及弟妹男女陪臣俱來成祖命  
中官興勞之閩中所過縣邑設食宴既至親享之奉  
天門賜儀仗銀器王以下使如中國服其年王卒會  
同館上輟朝三日賻贈有加工部具棺槨明器塋德  
安門外樹碑神道求西南夷藉中國者為守塚有司  
春秋少牢祠謚曰恭順命其子遐旺襲遣中官謙行  
人航護之還國賜金銀有差初麻那惹加那乃請表  
其國之後山為鎮國遐旺將行復以請上封其山為

長寧鎮國山親賜之碑文曰上天啓佑我國家萬世  
無疆之基肆命朕太祖高皇帝全撫所覆休養生息  
以教以治薄極照臨臣服充奏朕嗣守鴻圖和協所  
統亦克承意乃者淳泥國王麻那惹加那乃慕尚聲  
教益謹益虔率其眷屬陪臣浮海來朝稽顙陳辭遠  
方臣妾丕冒洪恩既庶且安夫天仰則覩之矣地立  
則依之矣天子補天柱地遠在中華弗依弗覩臣誠  
弗通是以不憚遠險輒敢造庭崩角闕下朕曰唯天

唯皇考畀予天下視民同仁予夙夜恐弗堪弗若汝  
言王拜手稽首自天子建元之載臣國和時豐山川  
之藏珍寶流溢草木之無葩蔕者以實以華異禽和  
鳴走獸踰舞國中之叟曰中國聖人德化所暨斯多  
嘉應是以矜奮而來覲也朕繙稽載籍邊遠之方被  
聞四訖忽險鑿空歸身中夏盖亦有人至于掖挾妻  
子率該兄弟總同臣僚款心玉帛順首階陛自古惟  
王西南君長無如王賢茲特封王國之山長寧鎮國

賜文刻碑以著王体系之詩曰炎海之墟滓泥所處  
趨景赴聲有順無忤悽賢王唯化之慕重譯更胥  
聿來奔走同其婦子兄弟陪臣跂伏悅喜具言以陳  
內鑒鮮德弗稱所云浪泊風檣實勞懇勤稽古遠夷  
順來怒趙以躬或難矧或家室鬱崛高山作鎮王國  
傳金勒銀懸昭順德王德克昭王國攸寧於萬斯年  
仰我大明遐旺還國遣其叔父慶的哩哈盈等百八  
十八貢方物入謝其後洪熙中復來貢表用刻金番

字彷彿回鶻書其辭固不足觀也萬曆間國王病卒  
無子族衆爭立相誅殺俱盡乃立其女主為王其屬  
國曰吉蘭丹

滿刺加

滿刺加古哥羅富沙也在占城極南永樂三年王西  
刺八兒速刺遣使奉金葉表朝貢言願內附為屬郡  
效職貢七年太監鄭和充冊封使賜印誥錦綺封為  
滿刺加國王九年嗣王拜里迷蘇刺率其妃子陪臣



五百四十人來朝 上御奉天殿宴王賜玉帶羽儀  
鞍馬金銀錢鈔錦綺王妃冠服子姓僚從賞各有差  
十年遣使送還國十二年王母來朝貢厚賜之二十  
二年宣德九年王復來朝貢賜六厚正統十年後數  
遣使來朝貢天順三年王無荅佛哪沙卒子蘇丹茫  
速沙請封遣使冊立為王成化末卒子烏哈木沙嗣  
遣給事中林榮行人黃乾亨奉使冊封還溺死以此  
遂罷遣其國舊名五嶼東南距海西北皆山地瘠鹵

故未稱國隸暹羅歲輸金五十兩既奉我正朔始不  
隸暹羅王白帛纏首衣青花袍躡皮屨乘轎俗淳朴  
尚回：教民舍如暹羅婚喪大類爪哇聯榻趺坐割  
木為舟泛海而漁旁海人畏龜龍龜龍高四尺四足  
身負鱗甲露長牙遇人即噬，即死山有黑虎視虎  
差小或變人形白晝群入市覺者擒殺之近滿刺加  
有點失佛即机貓睛鷹嘴奉髮赤鬚而貌皆白屬千  
系臘國屢侮滿刺加嘉靖中汪鉉征之其銃轟裂兵

不可近後鑑擒佛郎機傳其銃法請頒賜各邊大賴  
其用

榜葛刺

西天有五印度國榜葛刺者東印度也永樂六年王  
霸牙思丁遣使朝貢九年復至命行人宴勞之太倉  
十二年王塞弗丁遣人奉金葉表獻麒麟其國最大  
自蘇門答刺海行過翠藍島至漈地港更小舟行五  
百里至鎖紉兒港登陸行三十五里至其地廣八摺

財物豐衍中於諸鄰國，有城郭王及諸官皆回，  
人男祝髮白布纏頭圓領長衣束絲帨躡皮屨市用  
銀錢海貳五領山最高大氣候常熱如夏賦十二刑  
苔杖徒流官有印章行移軍有糧陰陽鑿卜百工技  
藝大類中國有衣黑白花衫縈帨佩珊瑚琥珀纓絡  
繫臂釧子鐳釧歌舞侑酒者曰根肖速魯奈，蓋優  
人也，能作百戲以鐵索繫虎行市中入人家解索坐  
虎于庭裸而搏虎，怒交撲仆虎數回乃已，或手捉

入虎喉虎亦不傷戲已仍繫之家人爭以啖虎勞  
戲者錢曆有十二月無閏風俗朴率好耕殖一年二  
熟產鑽鐵翠羽琉璃蛇馬桑漆樹絲綿尤多鎗剪最  
巧利布數種有濶四五尺者為黑幕勒濶四尺背白  
皆毳絨厚可五分即兜羅錦也白樹皮布膩滑光潤  
如鹿皮椰菜為酒檳榔當茶

錫蘭山

錫蘭山國古狼牙須亦曰裸形國不衣也亦不穀食

與柯枝對峙以別羅里為界占城極西可望見焉其  
國有翠藍山獨高山外番語謂高山為錫蘭也山頂  
產鴉鵲寶石每雨甚衝流下可拾取海畔石有巨人  
武長三丈許云是釋迦足跡下有卧佛寺舍利在其  
寢傍永樂初國王亞烈苦奈兒者鎖里人數邀叔往  
來使者諸番苦之七年鄭和偕行人諸番至其國王  
侮之欲加害和覺而去及歸復過王誘和至國中  
令其子納言索金銀寶物不與潛發番兵五萬餘出

叔之和覺擁衆回舟而亞烈苦奈兒已先伐木拒險絕和歸路。和語其下曰：賊衆大出，國中必虛，出不意攻之，可得志。潛傳語舟人盡力死拒。自率兵二千以夜半間道疾走，急攻王城，破之，生擒亞烈苦奈兒，并家屬頭目，悉俘復圍城，交戰數合，大敗之，遂以歸。九年，至闕下，群臣請誅之。上曰：朕憫其愚，釋而與衣食。命禮部詢所俘國人，擇其支屬賢者，立之。國人皆舉耶巴。乃耶巴十年，遣使賫詔，印往封，并送亞烈苦奈兒。

歸時國人已立不刺葛麻巴思刺查為王詔使遜位  
十四年偕占城爪哇諸使貢方物復命鄭和等賚賜  
之并及諸國王自後宣德正統天順間俱入貢其國  
地廣人稠貨物之聚亞於爪哇尚佛重象牛調牛糞  
塗地而禮佛煇之以塗體

### 蘇祿

蘇祿國在東南海中人鮮粒食：魚蝦螺蛤短髮纏  
卑綬煮海為鹽釀蔗為酒織竹為布氣候常熱永樂



十五年其國東王巴都葛以答刺西王巴都葛以蘇哩峒王以都葛巴刺卜各率其妻子頭目來朝貢珍珠玳瑁諸物賜王冠服王金帶蟒龍金銀錢鈔錦幣器皿王妃王子女姻戚頭目賜物各有差二王者東王為尊西峒二王副之東王歸次德州卒命有司營葬為文樹碑墓道留其妃妾及僕從十八守墓令畢三年還國遣使封其長子都麻舍為蘇祿國東王十九年遣使來貢獻巨珠一顆重七兩五錢蓋其國有

珠池故獻

柯枝

柯枝一名阿枝東連大山西南北皆海自葛蘭山海  
西北行一晝夜可至永樂二年王可亦里遣完者荅  
兒朝貢請封其國大山詔封為鎮國山賜碑文是時  
太監鄭和使至其國王瑣里人也首纏黃白布上  
不衣下縈絲帨束縵壓腰綴柳木葉皆全國人五種  
曰南昆與王同類祝髮線懸脰為貴族次回人次

富有財者曰哲地次牙僧曰革金又次卑賤者曰木  
爪木爪濱海而居業漁樵屋簷不得過三尺上衣不  
過膝途遇南昆哲地即伏候過乃起王尚浮屠敬象  
牛建寺範金為佛每旦鳴鍾鼓汲泉灌佛頂數回已  
乃禮之有曰濁肌者蓋優婆夷也娶妻不剃胎髮縷  
垂後牛糞灰塗體行吹大螺妻隨之乞錢氣候常  
熱多雨市用金銀錢銀錢十五當金錢一座珠象牙

蘇木

祖法兒

祖法兒亦名左法兒漢之大夏隋唐之吐火羅咸即  
其地也東南皆海西北重山自古徧西北海行十晝  
夜可至無城郭俗尚回教體幹修碩語言朴寔王  
白布纏頭衣青花絲帔或金錦袍靴屨乘輜跨馬前  
後列象駝馬吹華簫氣候常如秋市用金銅錢文  
人形水樂中王亞里遣人來朝貢宣德中復至產西  
馬駝鶴頂駝雞福鹿片腦沉香乳香諸奇藥以易中

國紆綵磁器駝雞如鶴長三四尺脚二指毛如駝行  
亦如之駝單峰或雙峰皆可乘

### 溜山

溜山四面濱海如洲在西海中有石門如城闕土瘠  
無城郭依山聚居八村稍大皆以溜名可通舟楫餘  
小溜無慮三十失船入溜溺矣土人曰此弱水三十  
也人巢居穴處不識菽粟啖魚蝦無衣草木葉蔽前  
後溜山傍有牒幹國皆回人俗淳厚業漁好種柳

樹氣候常熱如夏市用銀錢產龍涎香海貳柳皮結  
繩可貫板成舟塗瀝青堅如鐵釘鮫魚一名溜魚織  
絲恍甚精緻亦有織金恍永樂中國王太速福遣使  
來朝貢

### 南泥里

南泥里隸淳泥自蘇門答刺舟行三晝夜可至東距  
黎伐西北距海南連大山、南際海僅千餘家皆回  
回人俗朴寔王居類樓高廣嚴整幽潔市用銅錢少

穀食、魚蝦西北大海即西洋中有帽山平頂土人  
稱為那沒黎番舶皆以此山為指南山下淺水有珊  
瑚樹大者高二三尺分枝婆娑可愛依山居人二三  
十家皆稱王問其為誰輒曰阿孤楂華言王也或曰  
南泥里即南巫里

黎伐

黎伐小國南連大山北際海西距南泥里東南連那  
孤兒居氏一二十家推一人為首領隸蘇門答刺言

語服用與蘇門答刺同山野犀

撒馬兒罕

撒馬兒罕漢屬賓也在哈烈東北三千里東去嘉峪  
關九千九百里東西相距千里地平山川鐵門峽阿  
木河最大風景偉麗土田膏腴宜五穀頗類中原獨  
勝諸國城依平原濠深險北有子城王居高廣在城  
北隅王白帽城中達巷縱橫肆市稠密西南番賈多  
聚於此市易用銀錢禁酒俗尚回教有拜天屋青



石雕鏤極精巧以羊皮裹終文：字泥金書人物秀  
美多藝能尤善作室園東有養夷沙鹿海牙賽監達  
失干西有渴石迭里迷諸城皆隸焉洪武二十年閏  
主帖木兒遣回：滿刺哈非思貢駝馬詔厚賜之二  
十二年貢馬二十四年貢海青賜勅賁予之二十七  
年帖木兒遣使迭力必失表貢馬二百疋表曰恭惟  
大明大皇帝受天明命統一四海仁德弘布恩養庶  
類萬國欣仰咸知上天欲平治天下特命皇帝出膺

運數為億兆之主光明廣大昭然天鏡無有遠近咸  
昭臨之臣帖木兒僻在萬里之外恭聞聖德寬大超  
越萬古自古所無之福皇帝皆有之所未服之國皆  
服之遠方絕域昏暗之地皆清明之老者無不安樂  
少者無不長遂善者無不蒙恩惡者無不知懼今又  
施恩遠方凡商賈之入中國者使觀覽都邑城池富  
貴雄壯如出昏暗之中忽睹白日何幸如之人承教  
書恩撫勞問使站相通道道路無壅遠國之人咸得其

濟欽仰聖心如照世之杯使臣心中豁然光明臣國  
中部落聞茲德音惟知歡舞感戴臣無以報恩德惟  
仰天祝頌聖壽福祿如天地遠大永無極 上嘉  
其有文二十八平遣兵科給事中傅安郭驥等使西  
域留撒馬兒罕永樂五年頭目哈里令虎夕達送安  
等還且貢方物孳賜之正統十二年又貢馬玉石成  
化十九年阿黑麻貢二獅子夷使請大臣出迎禮部  
尚書周洪謨以為不可遣中官迎之獅日食生羊二

醋酣蜜酪各二瓶官養獅人光祿日給酒飯弘治三年蘇南海貢獅子禮官倪岳言南海非西域貢道請却之自後貢道皆從嘉峪關入嘉靖中其國稱王者五十三人皆遣人朝貢產金銀玉銅鐵珊瑚琥珀琉璃屬苾思檀水晶鹽花藥布名馬獨峰駝大尾羊狻猊

天方

天方國在西海之盡古稱沖默伽國民無貧苦繁富

和淳無雨雪霜電濃露夜霆遂滋生物產珍美色  
而是疑古所謂極樂國者即是地也國有禮拜寺  
分四方、九十間層次如塔皆白玉為柱黃甘玉為  
地中有黑石方丈餘曰漢初天降也月初生其首長  
率衆拜天以號呼讚揚為禮日中以熟市用日夕宣  
德七年國王臣深遣使沙璫以獅子麒麟貢正德中  
復貢嘉靖中定五年一貢

迭里迷

迭里迷在撒馬兒罕西南去哈刺二千餘里新舊二  
城相去十餘里王居新城東距阿木河一廣非舟不  
可渡城內外居民僅數百家華畜蕃息多魚河東地  
隸撒馬兒罕河西有蘆林多獅子

### 渴石

渴石在撒馬兒罕西南二百六十里城據大村周十  
餘里四面多水田東南近山中有園林故首帖木兒  
駙馬居也規模極宏壯當四隅白石柱如玉牆壁窓

牖盡飾金碧綴琉璃西行十數里皆小山多苾思檀  
菓樹又西去三百里大山屹立中有石峽西壁懸崖  
宛如斧劈行二三里出峽口有門曰鐵門關通西南  
大路

### 養夷

養夷在賽藍撒馬兒罕亦力把力蒙古諸部落間數  
相侵擾以故人無寧居惟戊午數百人處孤城中城  
四面皆亂山東北有大溪西流長數百里溪旁類垣

破廬蕭然草莽

達失干

達失干在賽藍西去撒馬兒罕七百里城據平原甚  
狹小四面平岡多林木溪流蜿蜒土宜五穀人稠密  
質朴饒衣食

卜花兒

卜花兒在撒馬兒罕西七百里城居平川周十餘里  
民物富庶市里繁華戶口萬計地平衍宜五穀桑麻



天氣溫和冬不附火蔬菜不絕產絲綿布帛六畜大  
類中國

黑婁

黑婁在嘉峪關西近土魯番世結好黑婁黑婁夷入  
貢從土魯番入其地山水草木禽獸皆黑男女亦然  
宣德七年始遣使朝貢

鹽澤

鹽澤在崖兒城西南去土魯番三十餘里在平川中

廣不二里居民百家黑的兒火者稱王居鹽澤既死  
土酋強者統之產石鹽堅白如石可琢為器以盛肉  
食不鹽而鹹

### 哈烈

哈烈一名里魯在撒馬兒罕西南去嘉峪關萬一千  
一百里四面多山王居在城東北隅室壘石平方若  
高臺無棟梁陶瓦中敞虛室數拾地鋪毡羅窓戶牖  
扉刻繪花紋金碧無君臣上下男女相聚皆席地跣

坐國主衣窄袖衣及貫頭衫戴小單刺帽以白布纏頭辮髮髻後國人尊稱之曰鎖魯檀華言王也國人之服與王同制上下相呼皆稱名相見稍屈身初相識則屈一足三跪以為大禮男女皆然飲食無匕筋釀酒多用葡萄酒大宴會則亦設几案尊者飲下人皆跪酒行則陳幣帛次珍寶又次金銀錢布坐間餘者撒坐外左右執事競拾之皆大誼笑名曰喜錢國無法律傷人及死罰錢而已婚姻以姊妹為妻妾男子

髡首纏白布婦女如之居止相混喪則易首布以青  
赤凡喪百日塋不棺囊瘞之不祝鬼神不祀祖宗祭  
祖宗於墓國中有通回、經者衆尊禮之城巾置大  
士屋設銅器如古鼎周圍數丈刻文器上游學子弟  
聚而習之若中國太學人善走日可二三百里土產  
有白鹽銅鐵琉璃金銀珊瑚琥珀珠翠之屬多桑宜  
蚕為紉綺細密過中國市中交易銀錢大小為三等  
國人成造而輸稅於國王國王記印為不者不得行

市有征什取二有權衡無斗斛洪武二十五年遣使  
詔諭酋長永樂七年頭目麼賚等朝貢正統二年指  
揮哈只等貢馬

默德那

默德那即回祖國也初國王謨罕慕德生而聖靈  
臣服西域諸國諸國尊為別諱拔爾華言天使也國  
中有佛經三十藏凡三千六百餘卷書兼篆草西洋  
諸國並傳用之隋開皇中國人撒哈八撒阿的幹葛

思始傳其教入中國其地接天方有城池宮室田園  
市肆大類江淮間寒暑應候民物繁庶種五穀亦有  
陰陽星曆鑒藥音樂諸技藝人俗重殺非同類殺不  
食不食豕肉織人雕鏤器皿最精巧宣德中國王遣  
人隨天方朝貢而今中華回種所在有之

俺都淮

俺都淮隸哈烈西南去哈烈千三百里東北去撒馬  
兒罕亦如之城在大村中村廣百里城居十一平曠

無險峻地沃人繁庶稱樂土

八刺黑

八刺黑一名八黑在俺都淮東北城居平川周十餘里南近山無險阨地平廣食物豐饒西南諸番賈聚焉永樂中哈烈沙哈魯各遣其子守之

于闐

于闐大國在葱嶺北二百里即瞿薩曰那國也地最大東西五千里南北千里漢唐皆入貢中國石晉時

王李聖人自稱唐宗遣人入貢封為大寶于闐國王  
宋末南遷朝貢不絕永樂六年頭目打魯哇亦不剌  
金遣滿剌哈撒木丁等貢玉璞十二年吏部員外郎  
陳誠至其國主微弱隣國交侵人民僅萬計皆避  
居山谷間境內惟火州魯陳哈失哈力阿力稍有城  
邑餘皆荒坦敗屋生里極蕭索永樂以後西戎奉職  
貢不敢輒相攻始得休息行賈諸番遂富饒桑麻木  
忝宛如中土人機巧喜浮屠法好歌舞工紡織相見



輒跪得問遺書戴于首乃發之稍知尊卑禮節狀貌  
亦似華人其山葱嶺為大嶺下有白玉河綠玉河黑  
玉河產玉胡錦雙峰駝諸香珠珊瑚翡翠琥珀花藥  
布名馬溫州臍金星石水銀獅子阿魏

### 火州

火州在嘉峪關外行可一月至本漢車師前後王地  
漢元帝時置戊巳校斜屯田於前王庭以其地勢高  
故名焉昌壘唐太宗平焉昌置西州及都督府後陷

于吐蕃其地有回鶻雜居故又名回鶻宋時屢遣使  
貢元號畏兀兒隸馬哈木入國朝號火州城北近山  
地多熱山青紅若火故名火州永樂七年土酋遣人  
朝貢十二年吏部員外郎陳誠至其國誠言其國風  
物蕭條市里民舍僧堂過半六皆零落東有荒城故  
址云高昌國治漢西域長火戊巳校斜並居焉宣德  
五年火州王哈散土魯番萬戶賽日帖木兒柳陳城  
萬戶兀赤剌俱遣人貢馬及玉璞至今入貢不絕俗

類白奴烏孫事天神信佛法貴食馬好騎射時節發  
水為戲其山川靈山蒲類海交河為大產馬駝鹽白  
氈布鎖鐵陰牙角阿魏

別夫八里

別夫八里沙漠地也馬哈麻王子居之無城郭宮室  
隨水草畜牧而已其王戴小單刺帽替鷓鴣翎衣禿  
袖衫削髮貫耳婦女裹白纒頂衣窄袖衣以白酪為  
食乳潼代飲間種棕麥織毛布為衣有松檜榆柳細

茶格桐六畜之屬羊爲最寒山谷中伏暑尚霜雪永  
樂三年遣使入貢

### 魯陳

魯陳一名柳城古柳中縣地去哈密千里中經大川  
砂磧無水草馬牛過此輒死大風倏起人馬相失道  
傍多骸骨有鬼魅行人失侶白日迷亡夷人謂之旱  
海出川西行至流沙河：上有小岡云風捲浮沙所  
積道北火焰山：色如火城方二三里四面多田園

流水環繞樹木陰翳土宜稌麥麻豆有小蒲萄甘甜  
無核名銷子蒲萄氣候和暖風俗醇朴人二種回  
男子削髮戴小罩刺婦女白布裹頭畏兀兒男子椎  
髻婦人蒙阜巾垂髻於額大抵皆胡服

沙鹿海牙

沙鹿海牙在撒馬兒罕東五百里城據小岡西北臨  
河一名火帖水勢衝急有浮梁渡舟其南近山三面  
皆平川人繁庶依崖谷而居園林廣茂西有大沙洲

可二百餘里無水即有水人不可飲牛馬亦輒死  
有臭草根株獨立高尺許枝葉如蓋春生秋死臭氣  
逼人取生汁熬膏為阿魏亦有細草可熬膏味如蜜

### 賽藍

賽藍在達失干東去撒馬兒罕千三十里城周三里  
四面平原草木長茂流水環繞五穀蕃殖秋夏間草  
生黑蜘蛛甚小毒甚噬人遍身痛號呼聲動地土人  
襍詛者口誦呪以薄荷枝拂中毒處又以鮮羊肝遍

擦其體經一晝夜痛方息愈後皮膚如蛻脫牛馬被傷輒死行人宿必近水避之

哈失哈力

哈失哈力宣德間遣十四人來朝貢或曰即阿力馬力

亦力把力

亦力把力在沙漠間或曰烏耆或曰龜茲元時別失八里馬哈木封於此洪武二十四年國王黑的兒火

者遣人貢馬永樂四年王沙迷查千遣人貢玉璞十  
二年陳吏部誠使其國十六年復貢正統二年王也  
先不花遣人貢玉璞駝馬景泰天順間貢使不絕其  
國無城郭宮室逐水草住牧設帳房擅鬪寒暑坐卧  
于地其王戴小單刺替鷄翎衣禿袖衫削髮貫耳飲  
食肉酪或食稊麥為毛布多雪霜平曠之地是秋畧  
煖深山大谷六月飛雪俗獷戾服用污穢上下無紀  
律其山白山葱嶺為大有熱海然氣常寒產銅鐵鉛



雌黃胡粉馬駝犂牛孔雀氍毹阿魏白氍布

阿井

阿井近古俚瀕海可舟行國中富饒有馬步勝兵七八十鄰國畏之永樂九年詔中使鄭和賜命立市

白葛達

白葛達海中小國土瘠俗尚佛教宣德七年國王遣和者里一思等來朝貢

阿哇

阿哇國永樂三年其國王昌吉刺遣人朝貢

瑣里

瑣里西海中小國物產甚微有撒哈刺諸異布洪武  
五年國王卜納的遣撒馬牙茶嘉兒幹的亦刺丹八  
兒奉金字表朝貢圖上其土地山川賜大統曆金幣  
永樂元年復遣人朝貢

西洋瑣里

西洋瑣里近瑣里視瑣里差大物產大類瑣里洪武

三年使來以金葉表文貢方物 上喜王敬中國涉  
海道甚遠賜甚厚永樂元年復遣人朝貢 上曰海  
外遠夷附載番貨勿征二十一年西洋十六國遣使  
千二百人貢方物至京師西洋瑣里貢獨豐美

彭亨

彭亨國在暹羅之西石崖周圍遠望則平田沃壤豐  
米穀氣候溫洪武十一年國王麻哈刺惹荅饒遣使  
奉表貢番奴方物永樂十二年再至故志上下親狎

無寇盜男女推尊佛其故俗也萬曆中而其國中  
有柔佛之事柔佛彭亨鄰國也其國有副王為人強  
悍聞狠副王子娶彭亨王女將婚副王送子之彭亨  
彭亨王享副王為置宴戚屬而有婆羅王子者彭亨  
王妹之壻也贅于彭亨酒半婆羅王子舉觴為壽其  
手指有巨珠甚美副王心欲之且許之重貲王子固  
靳不與副王恚甚歸而起兵攻彭亨彭亨柔佛兩國  
相婚媾柔佛人狎至莫為防不戰自廢王與婆羅王

子奔金山彭亨王妃淳泥王之妹也率衆來援副王  
大焚掠其城郭宮室以歸是時也彭亨國中鬼哭三  
日淳泥王迎其妹還淳泥彭亨王隨之命其長子擁  
國王歸彭亨其次子六駝悍遂毒父誅兄自立今尚  
為王也

百花

百花古注輦國在海中依山為國中有奇花嘉樹  
故名國東南約二千五百里民富饒尚釋教洪武十

一年國王刺丁刺者望沙遣八智亞壇奉金葉表朝  
賀產紅猴龜筒玳瑁孔雀倒掛烏胡椒

### 娑羅

娑羅國東洋西洋交界之處國有二王永樂四年二  
王遣使勿黎哥來朝貢真珠玳瑁馬瑙車渠賜王及  
妃文綺其國負山面海而謹佛教今王為閩人隨鄭  
和至留其國者其府旁有中國碑王有金印一上篆  
文作獸形云是永樂中所賜夷人嫁娶請印：背上

其國常為佛即機所遂走入山谷中放藥水流出毒  
死之佛即機以是弄呂宋之奇化

小葛蘭

小葛蘭海上小國也與柯枝接壤永樂中太監鄭和  
至其國王鎖里人遣人入貢俗尚浮屠重象牛飯和  
酥酪市用金錢婚喪中服大類錫蘭山自錫蘭山別  
那里西北海行六晝夜可至

拂菻

拂菻國唐書稱漢大秦國也去嘉國關萬餘里洪武  
四年遣其國故民程古倫賫詔諭之尋遣人來朝其  
俗土產無尾貴臣如王服不尚戰鬥產金銀珠西錦  
千年來馬獨峰駝巴攬甸箇縣大金秤以金凡十二  
定日時每時至輒一丸墜用金銀錢勒王名於錢陰  
古里班卒

古里班卒在海中永樂三年國王遣人馬的來朝貢  
其俗土瘠穀少登氣候不齊夏多雨即寒俗質朴



男女披短髮假錦纏頭紅油布繫身物產甚薄

呂宋

呂宋海外小國也其國王以永樂三年遣其臣隔察  
老朝貢而近為佛郎機所有名呂宋寔佛郎機也初  
呂宋王兄弟二人武而有信佛郎機互市其國利其  
為西洋諸番通貨之會奉黃金為呂宋王壽從王乞  
地如牛皮許大許之佛郎機歸而截牛皮縫長之  
方四圍呂宋王有難意業許之不得辭歸其地佛郎

機築城屋列兵器久之殺王兄弟遂呂宋民入山中  
凡中國以貨來者皆主之其地名澗內者漳州人多  
居之佛即機虐使之漳人忿怨有潘利五者夜入首  
卧內刺殺首持首首大呼佛即機人大驚起不知所  
為悉被刃或落水死利五與其黨大載佛即機貨物  
以歸首既死其子代遣僧人入閩訴之巡撫巡撫為  
下利五等於理是萬曆三十一年事也次年天子  
採金方內有妄男子張疑上書言呂宋有機易山其

上自主金豆可採也命閩撫使海澄丞王時和與疑  
往佛郎機款丞酒問丞金豆生何樹丞無以對數日  
疑：為大言大地皆金何必問樹夷酋大咲幾殺丞  
丞歸病悸死疑無以報天子遂誅疑傳首海外夷人  
故虐侮中國人至是益疑四遣人買中國人藏鐵雖  
機上刀竈上釜悉倍其直中國人鐵皆空遂大殺中  
國人死者二萬餘首猶慮中國興兵問罪入廣香山  
灣偵謀中國乃寂然閩廣當事者草：聞上而不敢

盡言上下旨呂宋無開事端已而中國人又商敗其  
地矣其屬夷有大港有南旺有玳瑁港有呂蓬有磨  
老央有以寧有屋當有朔霧而皆佛即機主之佛即  
機破呂宋朔霧有力焉佛即機德之既奄有諸土率  
國使其民獨與朔霧為婚媾其人敬天稱天曰寥氏  
合猫里

合猫里地小土瘠國中多山，外大海，饒魚蟲人  
亦知耕稼永樂三年國王遣回，道奴馬高來朝貢

產蘇烏木胡椒

碟里

碟里國在東南海中大洲上洲有諸港通海人淳少  
訟尚佛物產甚薄永樂三年國王遣使馬黑木來朝  
貢

打回

打回海外小國數為鄰國所苦已乃治兵器與鄰國  
戰、勝稍得自立永樂三年遣麻勿來朝貢

日羅曼治

日羅曼治海中小國無他奇產蘇木胡椒頗知  
種藝無盜賊崇佛教永樂三年國王遣人那打時鎮  
來朝貢

忽魯母思

忽魯母思在東南海中或曰在西徼外國小土瘠物  
產薄永樂三年國王遣已即丁朝貢

忽魯謨斯

忽魯謨斯在西南海中東連大山國中土阜宜耕種  
人質直狀貌偉碩喜作佛事常歌舞惡殺永樂十八  
年國王遣馬刺足來朝貢進獅子天馬文豹紫象駝  
雞福鹿靈羊長角馬哈獸五色鸚鵡等物駝雞高七  
尺福鹿似駝而花文可愛靈羊尾大者重三十斤而  
則以車載其尾長角馬哈獸角長過身 上喜命侍  
臣為賦其國石城石屋民富饒產大馬其酋長練兵  
畜馬田瘠宜麥無草木牛羊駝馬盡食魚腊文武暨

卜枝藝之人勝他國，中有大山四面異色，紅如銀，  
硃白如石灰，黃如薑，黃一面產鹽如紅礬，鑿為盤，匣  
乘食，味鹹如石鹽。

甘巴里

甘巴里在南海中大島上，人多織錦粒食，亦鮮食。永  
樂十二年，國王梵哇刺查遣得名公葛來朝。

麻林

麻林未詳所在。永樂十三年，遣使獻麒麟、天馬、神鹿。



群臣稱異 上喜厚賜之

古麻刺

古麻刺在東南海中國有百餘州佛宇四十餘永樂十八年王哇刺義亦敦奔率其妻子陪臣來朝至福州卒賜謚康靖初莖閩縣有司歲時祭

沿納樸兒

沿納樸兒國在印度之中古佛國也永樂十八年國王亦不刺金數侵榜葛刺國遣使勅諭之遂遣使入

貢

加黑勒

加黑勒西戎小種居人不及千家貧窶乏食常傭鄰國永樂中王者麻里奈那遣使別里木不來貢方物宣德正統間貢使不絕

敏真誠

敏真誠國亦大多高山水流深縛木為渡日中為市諸賈皆集見中國磁漆器爭欲得之產異香駝馬水

樂中國王遣四十八來朝貢

八答黑商

八答黑商永樂間遣四十八來朝貢方物織皮絨罽  
香木其國山川明秀人俗朴定奉佛有浮屠數區壯  
麗如王宮西洋西域皆商販於此大抵皆羽毛織文  
玉石香木駝羊也布帛銀錢皆可交易

覽邦

覽邦漢疎勒國也洪武九年國王昔里馬哈剌的剌

札遣使朝貢永樂宣德中嘗附隣國貢方物其國去  
西域遠甚好佛無賈販地多沙磧種麻及麥而已山  
坡坳無峰巒水亦淺濁所產僅駝馬牛羊市亦用錢

火刺札

火刺札國微人弱物產涼薄四圍皆山，鮮草木水  
流曲折亦無魚鰕城僅里許皆土屋板屋王居亦陋  
俗尚佛重僧喜中國磁器針線永樂十四年嘗遣人  
朝貢

討來思

討來思在海中周徑不百里城近山下有水赤色  
望之如火然俗尚佛婦人主家事市中多駝羊馬牛  
亦有布縷毛褐交易用錢土宜麥稌無稻穀宣德六  
年嘗遣人入貢

吃力麻兒

吃力麻兒永樂中遣使十一人來朝貢方物惟獸皮  
鳥羽罽褐之類其俗不事畊農喜射獵山平水淺西

南傍海東北林莽深密多猛獸毒蟲得中國雄黃麝香磁器甚喜有達巷無市肆交易無期用錢鐵

失刺思

失刺思永樂間遣人來朝貢時遣內外官以綺幣磁器市馬於迤西撒馬兒罕失刺思諸國獻陵即位詔諸使至十日內就所在還京無得托故稽留宣德中遣使八人來朝貢

納失者罕

納失者罕東去失刺思數日程皆舟行海中其國山林川澤有林木魚蟲城東平泉饒水草可牧馬，有數種最小者高不過三尺俗故事僧，所至必飲食之頗尚氣健聞，不勝者衆共嗤之永樂中遣使十八來朝貢

亦思把罕

亦思把罕於西南海中為大國廣袤近十里四面皆海西北多山東南皆平沙國有城堅壯王居亦侈麗

物產豐厚風俗質朴尚佛思刑喜施惡奪亦有中國  
人寓寄者時出賈撒馬兒罕市多馬駝少布帛有  
珠珀而無稻黍日食惟麥稌麥粒麤甘美甚永樂中  
遣使四十四人來朝貢

淡巴

淡巴古狼牙國在西南海中洪武十年國王佛喝思  
囉遣使貢賜之金幣其國風景秀贍土地廣衍泉甘  
而水清草木暢茂畜產甚夥城以石築屋以瓦覆王



乘輿官跨馬頗有威儀國人勤生種藝織綌抱布男  
女咸務常業市有交易野無寇盜稱海中樂土

甘把里

甘把里永樂間遣六人來朝貢自言其國小介其西  
南海中與諸鄰國不通交易物產人薄山無長林旧  
無宿麥以故國用常乏人民艱窘然奉佛好善不求  
積聚無乞丐者

白松虎兒

白松虎兒舊名速麻里兒國中無大山；卑小者亦  
鮮林木無猛獸毒虫之害先時嘗有白虎出松林中  
遇獸不食遇人不傷旬月後竟不見國人稱為神虎  
父老又曰此西方白虎降精以是更其國為白虎松  
兒永樂中遣使十六人來貢

### 答兒密

答兒密永樂間遣使十八人來朝貢方物賜大統曆  
大綺藥茶國在海中不百里人不滿千家有墻壘而

無城郭屋以板覆田以牛耕王居官舍不甚差別產  
馬駝牛羊毛褐布縷交易無用銀錢刑專用董朴服  
屬撒馬兒罕

阿速

阿速在西海中為大國多撒馬兒罕天方諸國人有  
城倚山面川南流入海有魚鹽之市野有耕牧  
之利敬佛畏鬼好布施惡爭鬪物產饒裕涼暄適節  
人無飢寒夜無寇盜永樂中遣百十二人來朝貢

沙哈魯

沙哈魯永樂間遣七十七人來朝貢國在阿速西南  
海島中人民淳直恥鬪好佛交易海中諸國西域賈  
胡來市海中奇物不惜高價亦有價廉而得奇貨去  
者沙哈魯人不識也王及酋長居城中有瓦屋庶人  
旅處城外田野中村落相聚山川環抱畜產並利

黑葛達

黑葛達國小民貧平川廣野草木暢茂禽獸鮮少尚

佛畏刑市肆多牛羊交易用鐵錢宣德中遣使十八  
來朝貢方物又有白葛達國宣德中亦至

不刺哇

不刺哇國永樂中遣使朝貢地片鹵有鹽池拔樹枝  
於池頃刻鹽凝其上其人拳髮圍布捕魚為業

沙里灣泥

沙里灣泥國永樂中遣使朝貢

花白園

花面園即那孤兒王也其地與蘇門答刺隣境傍南  
巫里洋遙迤山地國小僅比大村社千餘家男子皆  
以墨刺面為花獸之狀獠頭露体单布圍腰婦女圍  
色布披手巾椎髻腦後地多出牛羊雞鴨羅布強不  
奪訪上下自耕而食地產香味青蓮花近布那姑兒  
一山產硫黃貨用段帛磁器之類其酋感慕思賜常  
貢方物

阿魯

阿魯國一名啞魯與九州山相望自滿刺加順風三  
晝夜可至其風俗氣候與蘇門答刺大同小異田瘠  
少收盛種芭蕉椰子為食男女裸體圖稍巾常駕獨  
木舟入海捕魚入山採米腦香物為生各持藥鋏弩  
防斗地產鶴頂片米糖腦水藥五年其王速魯唐忽  
先遣使附古里諸國朝貢

大葛蘭

大葛蘭國與都蘭相近其民不事耕作賴烏爹之

米為食商船過此有高頭埠沉水羅朕石之險男女  
纏頭穿單布長衫圍色布手巾地產胡椒子溜魚檳  
榔永樂中遣使朝貢

竹步

竹步國與木骨都東地相連村居寥落壘石為城砌  
石為屋風俗亦淳男女拳髮男子圍布婦女出則以  
布兜頭不露身面山地黃赤數年不雨草木不生絞  
車深井網魚為業地產獅子金錢豹駝蹄雞有高六



七尺者其足如駝蹄龍涎香乳香金珀永樂十八年  
朝貢

木骨都束

木骨都束國其地瀕海堆石為城礫石為屋男子拳  
髮四垂腰圍稍布女人髮盤於腦黃漆光頂兩耳挂  
絡索數枚頂帶銀圈纓絡垂胸出則單布兜襠青紗  
蔽面足履皮鞋山連地曠土石黃赤田瘠少牧數年  
無雨穿井甚深絞車以羊皮袋水風俗囂頑操兵習

射居民以捕魚晒乾為食及餵養駝馬牛羊地產金錢豹龍涎香永樂十八年進貢

### 刺撒

刺撒國傍海而居連山曠地草木不生牛羊駝馬皆以海魚晒乾啖之氣候常熱田瘠少收惟有麥菽壘石為室高三四層其上廚廁卧室皆具其下奴僕居之地產龍涎香乳香十里駱駝民俗淳厚喪葬有禮永樂十八年遣使捧金葉表文奉貢方物

石匱書曰自古王會之盛無過西周奉玉帛而至者  
千百八國此特以其泗上諸侯言之也若乃都營小  
國攷其方輿止不及我明一邑而今之三年輯瑞萬  
國衣冠已數倍過之矣至如白雉旅熬重譯四至絕  
域遐荒皆充庭寔上下百王誰媿其美則昔之屠著  
稽首遂爾稱雄者亦何其自見渺小哉